

M135: Ältere niederrheinische Marienklage

0,1 Hi biwre in wist ich wat leit were
0,2 nu bin ich uirladit mit sere
0,3 Di iuden hant binumin der werlide ir lith
0,4 vndi mir alli mine zuvirsith
0,5 Minis herzen suzicheit
0,6 vnde sowas ich lives hadde dat zegeit
0,7 Dat is mir allis kumin zu pinen vnde zu ruwen
0,8 wi solde ich arme des gitruwin
0,9 Dat di undir di schechere solde w'din gizalt
0,10 di des himilis unde der erden hat giwalt
0,11 Liuiste allir kinde
0,12 wi math du liden dat man dich sus binde
0,13 Sich din arme mudir ane
0,14 Dat su sus weinit alli tage
0,15 Dv were ir trost aleine
0,16 want mad du si tun weinin
0,17 Ei wi hart sint dine bende
0,18 Waz hant wirwort dine vuozse undi din hende
0,19 Dat man si mit nagilen solde durchborin
0,20 suoszer lib wi han ich dich sus w'lorin
0,21 Ei weme mach ich nu clagin
0,22 di grozsine pine di ich dragin
0,23 Di pine di ich liden
0,24 wi mocht ich di vormiden
0,25 Di vuonnden vlizint
0,26 Dat blut si ane gissent
0,27 Ei vvi varloz ich dich schin
0,28 wi mohti dat imm' sin
0,29 dir mir herzeleit gischin
0,30 wath duch mir me dat leuin
0,31 Sint du mich muoz so sere uirgeuin
0,32 Ich sin dich nachit unde an umbecleit
0,33 Ei dat is dinir mudir leit
0,34 Ei wi oweie si dir lonint
0,35 dat si dir so luzil sconint
0,36 we wolde nu also iemirliche irsteruen
0,37 wat mohti he ouch da midi irw'ven
0,38 Ei wi swinde was di hant

0,39 di dir aue zugin din gewant
0,40 Wi sere si sich bidrugen
0,41 di dich an en cruce slugen
0,42 Gebenidigit si dine gedult
0,43 dit in has tu nit virschilt
0,44 Dv inphehes is allis zu gude
0,45 mit vil semftigen mude
0,46 Ei wi uvale han ich biuunden
0,47 an dinen heligen wnden
0,48 dat mir sagite symeon
0,49 alliz dat mir gisehen solde
0,50 dat mich ein swert solde durchslan
0,51 dat sin ich nu vor mir stan
0,52 Dat swert dat da snidit dat is di bithirtheit
0,53 Di min herze leit
0,54 Dem ich inflin nit in mach nit intwichin
0,55 he in muozse min herzenleit ani sin
0,56 Mocht iz nu gischin dat ich wolde
0,57 dat ich mit ime st'uin solde
0,58 Wat wurre mir dan armin wiue
0,59 ob min sun bliue zu libe
0,60 Alli pine wold ich ummir undirstan
0,61 dat he dodis mothi ingan
0,62 Ei wat heth he vbilis gidan
0,63 Dat man in mit ruden solde slan
0,64 wat hadde he givromit
0,65 unde mit w'chen unde mit reden gidonit
0,66 An di smerzin von den wundin
0,67 so hant si in so uaste gibundin
0,68 vndi hant in mit dornin gicronit
0,69 do hant si ime vil unrechti gilonit
0,70 Si hant in bispuen vndi an dat cruce gislagin
0,71 Dat hat he allis gidultliche uirdragin
0,72 So dat he nit solt in guan
0,73 Aleine hant si in vor einin undedigen man
0,74 Nit in sconit mime libe
0,75 upe dat min sun leuindich bliue
0,76 In mag ich nit irw'ben
0,77 dat ich vor in muzse steruen
0,78 So wil ich dat ir mich neit
0,79 undi mit ime an ein cruce sleit
0,80 Dat ich sinis dodis si gimeine
0,81 wande he stiruit vuile aleine
0,82 Geuit mir doch den doden lib
0,83 von ich sin mudir bin undi ein vil armis vuib
0,84 Dat ich mich gisade minis ruen
0,85 vnde min leit dicke irnuen
0,86 als ich in handilen undi ani sin

0,87 so ne mochte mir nimmir liuer gischin
0,88 Ich wolde dat mich der dot ani queme
0,89 vnde mit doch nit schire von disime libe neme
0,90 Ich solde einin des irmanen
0,91 dat he lange bit mir solde wanen
0,92 Liuir were mir dat ich allin dac virdurwe
0,93 dan ich snellis dodis irsturue
0,94 Dat di steine spaldent
0,95 in din graf di doden us schaldint
0,96 Dat di dodin ub steint
0,97 undi her us in di stede geint
0,98 Dat si giclagin irin trost
0,99 di si von missiqueme diche hat irlost
0,100 Dat i- ist allis wundir nit
0,101 von der grozsir mendat di is gischit
0,102 Wi mochte di sunni schinin
0,103 so si gisit irin herrin in den pinin
0,104 Wi mochte dat den sichin zu gude kuomin
0,105 dat in der arcet is binumin
0,106 Di sechere barrabas
0,107 di ein mansletigir was
0,108 Den haldint si zu live
0,109 vnde willint dat ih-c aldus iemirliche bliue
0,110 Hi mide wenint si vride han
0,111 dat si slent einin unsuldigin man
0,112 Dirre rad sal in schaden unde nit vrumin
0,113 wande kurtlich sal di zit kumin
0,114 Dat si nit in mugin vormiden
0,115 si ne muzsen starke vrachi liden
0,116 Von hungere von durste vnde von sw'de
0,117 dat si fluen ob si mochtin undir di erde
0,118 Dan alliers sulin si wesin guis
0,119 dat ihesus zu irme scaden dot ist
0,120 Vnde dat di schedere sal ub stan
0,121 di si sal als ein vihe slan
0,122 Den si seluin haddin irkorn
0,123 du si is wale mochtin han inborn
0,124 Blint volc vnde vil arme lude
0,125 gedenkit vvuirs heilis doch hude
0,126 Hauint ruwen unde gidenkit ure missedat
0,127 vwir mach noch werden gut rad
0,128 Di milde ih-c is gireit
0,129 dat he uch zu gnadin intfeit
0,130 Dochtere von syon wol ir nu schrien
0,131 mit mir vvil armin marien
0,132 Sit an die grozs sin barmh'zicheit
0,133 di min sun dir werlde deit
0,134 Di pinin lidet he mit zuzlichen gibere

0,135 alsi si in bidalle nit biswere
0,136 wen alse Sizzit in sime gimache
0,137 idoch so scaffet he vwir schachen
0,138 He virdiliget vwir schude
0,139 mit uil grozser gedulde
0,140 Di sine gnade infeit denkliche
0,141 undi louit in me zv himile gimenliche
0,142 alda ir in sit a deme cruce stan
0,143 da sult ir in lifichi in umbevan
0,144 kussit sine vuoze unde sine hende
0,145 sit wi iemirliche he henge
0,146 Idoch intluchet he sin arme
0,147 vnde willint sich al de w'ldde irbarmin
0,148 vnde willit si brengen zu deme ewigen liue
0,149 iz in si dat is an in bliue
0,150 Helpit mir liuin kint min leit clagin
0,151 so mach ich desten baz uirdragin
0,152 alse ich v dun dut mir also
0,153 van einin sachin wil ich wesin vro